

四庫全書

集部

欽定四庫全書

劔南詩藁卷十九

宋 陸游 撰

曉出南山

久向人間觸駭機
斂收孤迹早宜歸
亡羊未恨補牢晚
搏虎深知攘臂非
明月長庚天欲曉
新桐清露暑猶微
扁舟蓑笠平生事
莫羨黃金帶十圍

聞韓无咎下世

書劒飄然去國時南蘭陵郡日題詩吳波漲綠迎桃葉
穰燭堆紅按柘枝故友去為山下土衰翁何恨鬢邊絲
憑高老淚無揮處神武衣冠挂已遲

官居書事

早涉人間足畏塗一麾投老向江湖年光已上星星鬢
日力猶供急急符本自陽狂無藉在更堪羸病不枝梧
籌邊意氣嗟誰許淚盡神州赤縣圖

又

走遍人間老更窮，強尋一笑與誰同。
簿書衮衮呻吟裡，歌舞紛紛困睡中。
手版倒持悲末路，寒江獨釣媿高風。
知心賴有譚夫子，時遣書來問放翁。

比數得譚德稱書

夏日北榭賦詩奕棋欣然有作

異事嚴州省見稀，幅巾闌角立多時。
青林白鳥自成畫，急雨好風當有詩。
酷信醫方逢酒怯，強驅吏牘坐衙遲。
悠然笑向山僧說，又得浮生一局棋。

謁告歸臥晚登子城

此身真是抱官囚，厭見長空赤日流。
坐壁曉山千嶂雪，扇紈新雁一汀秋。
繫船空作清湘夢，御氣難尋太華遊。
菱角藕絲還恨少，強攜玉瀝醉高樓。

迓使客出郊夜歸過市樓

山川慘澹作秋霖，雲物徘徊結夕陰。
手版向人慙老大，肩輿出郭當登臨。
二年雪瀨饒羈思，萬里冰河歇壯心。
却羨喧呼樓上客，隔簾紅燭醉更深。

秋夜登千峰榭待曉

萬里秋風夜艾時
剡川孤客不勝悲
讀書眼暗定誰許
憂國涕零空自知
欲墜高梧先策策
漸低北斗正離離
倚闌不覺雞號曉
剪燭題詩寄所思

九月初郊行

九月吳中尚裊衣
江郊策馬踏斜暉
蕎花漫漫連山路
豆莢離離映版扉
蒼兔避鷹投磧去
黃鶴脫網傍人飛
農家光景關心事
不為無才也合歸

衰病

衰病龍鍾已要扶誰憐猶作折腰趨世無魯國真男子
心憶高陽舊酒徒萬里秋風吹鬢髮百年世事歎頭顱
桐江久客無奇句孤負君王乞左符

書意

一鳴輒斥不鳴烹禍福元知未易評湖海淒涼身跌宕
孟觴豪舉筆縱橫敢希二頃成高臥但願諸公致太平
波暎龍舟泝清汴道邊扶杖眼猶明

秋懷

策策桐葉風濛濛
菊花雨空堂一燈青
幽壁百蟲語嗟
余豈願仕老病歸無所
屈指計歲年強半墮
羈旅荷戈
北戍秦挂席西適楚
名慙垂竹帛文不諧
律呂所餘惟一死
忍復類兒女金丹或可成
青霄渺輕舉

過村店有感

細篾絡丹柿
枯籬懸碧花
炊煙生旅竈
野水漱寒沙
棲鳥爭投樹
歸牛自識家
恍然遊蜀路
搔首憶天涯

嚴州大閱

鐵騎森森帕首紅角聲旗影夕陽中雖慙江左繁雄郡

白樂天詩云雪川何寂寞茂苑太繁雄

且看人間矍鑠翁清渭十年真昨

夢玉關萬里又秋風憑鞍撩動功名意未恨猿驚蕙帳空

後園閒步

木葉勾萌喜小春鬢毛蕭颯媿陳人今朝忽破簿書夢
此地暫還風月身閒岸綸巾照清淺却扶藤杖上嶙峋
人生要是便疎豁金馬銀臺莫問津

照潺湲閣下池水

平生不鑷白霜雪滿鬢
看照水默自笑已迫溝壑期慨
然念歸休不計妻子飢渠飢亦有命我節詎可移自我
來桐江實無負惇嫠讒波如崩山孤迹則已危陸子定
何人正恐君未知午枕夢剡曲秋風吹釣絲

秋郊有懷

漫漫蕎麥花如雪覆平野
離離豆子莢數枝忽堪把頗
憶故鄉時屏迹謝車馬
水宿依蟹舍泥行沒牛蹠作勞

歸薄暮濁酒傾老瓦縷飛綠鯽膾花簇頰鯉鮓棄官雖
未決世念亦已且浩歌續楚狂幽懷欣獨寫

又

檐頭買雙兔市店取斗酒還家埽北窓歡言酌親友家
貧氣未餒禮薄情更厚高吟金石裂健筆龍蛇走酒闌
起出門孤月挂衰柳大笑各散歸吾輩可不朽官身縛
簡書此樂寧復有悵望秦稽雲憑高一搔首

又

楚人固多孱妄謂秋可悲寧知河嶽間氣俗樂此時壯
士鳴離弓健馬嚼枯萁日馳三百里榆關赴戰期陣雲
壓龍庭殺氣搖參旗熾火燎狐兔倒瀉黃金卮勒銘燕
然石千載鎮邊垂安能空山裏凍研哦清詩

又

秋山瘦益奇秋水淺可涉出城西風勁拂帽吹脫葉新
霜拆栗罅宿雨飽豆莢枯柳無鳴蜩寒花有穿蝶郊行
得幽曠頗覺耳目愜斷雲北山來欣然與之接挂冠易

事爾看鏡歎勛業永懷桑乾河夜渡擁馬鬣

夙興

喔喔老雞催落月丁丁殘漏伴斜河一盃淡粥寒燈下
還與山僧不校多

聽事望馬目山

官身早暮不容閒塵土堆胸媿滿顏也有向人誇說處
坐衙常對水南山

秋興

滿簪白髮不勝繁竊祿偷安媿主恩東館煙波秋漸瘦
北山霧雨晝多昏功名蹭蹬身長棄籌策瀾翻舌幸存
堪笑此生虛過盡一秋閉閣聽啼猿

又

孤城寂寞近江干處處疎砧送早寒水落纔餘半篙綠
霜高初染一林丹民租屢減追胥少吏責全輕法令寬
偶有一樽聊獨醉強按黃菊助清歡

久無暇近書卷慨然有作

少年喜讀書事業期不朽致君頗自許書卷常在手白
頭乞鍾釜坐使此心負朝衙有達午夕坐或過酉文符
苦酬對迎餞厭犇走直憂先狗馬豈但凋蒲柳永懷簡
編香更覺冠冕醜飢餐一簞飯悶酌一卮酒吟哦從所
好貧賤亦何有余悔已莫追寄謝故山友

嚴州多菊然率過重陽方開或舉東坡先生菊花
開時即重陽之語余謂此猶是未忘重陽者恐
此花不肯也戲作一絕

無人喚醒賦歸翁滿把清香誰與同
但辦對花頻舉酒
莫橫重九在胸中

地僻

地僻天教養散材流年況著鬢毛催
青山自繞孤城去
畫角常隨晚照來
几淨雙鉤摹古帖甕香小啜試新醅
藥槎不是星躔遠無奈先生興盡回

吏責

吏責何時得暫停年來減盡鬢邊青
高談正樂催迎客

美睡方酣報掣鈴安得雲山長在眼便從樵牧與忘形
詩成不用頻怙悵自古籠禽例翦翎

張時可直閣書報已得請奉祠雲臺作長句賀之
燈前一笑拆書開喜見冰銜洗俗埃丞相苦留猶不住
諸公欲挽固難回玩鷗有約間何濶斂版無聊歸去來
千載伏波應太息輸君談笑上雲臺

累日文符沓至悵然有感

豪氣人言苦不除固應屏迹向江湖封侯萬里獨心在

餬口四方何事無薄俗更堪開眼看老翁寧辨折腰趨
鼠肝蟲臂今無擇付與乾坤造化爐

又

白首逢人只累欬今雖未是昨真非文章才盡欲焚橐
仕宦興闢當拂衣浪出自應為後戒放言那計墮危機
遼天華表蒼茫裏千載何人識令威

又

三十年為一世人孤城夢斷洛陽塵

游忝朝迹今二十有八年矣

強

顏嬾復看人面何地真堪著此身白骨久埋金谷友黃
花尚醉葛天民嚴光釣瀨雖亡恙除却江山萬事新

大風

初聞瀕洞怒濤翻徐聽驂驪戰馬奔紙帳蒲團坐清夜
恍如身在若耶村

冬夜讀書

退食淡無事一窓寬有餘重尋總角夢却對短檠書功
業雖蹉跎光陰且破除更須求半偈回向此心初

再用前韻不以次

壯心雖迫老吏責未妨書言議思公瑾英雄陋本初移
燈近牀榻聽雨落堦除回首山南戍流年一紀餘

思歸

短髮今年雪滿巾一盃且醉瓮中春定無術致長生藥
那得愁供有限身碎枕不求名利夢挽河盡洗簿書塵
江湖意決君知否致主唐虞自有人

喜小兒病愈

喜見吾家玉雪兒今朝竹馬遶廊嬉也知笠澤家風在
十歲能吟病起詩

緯忽作病起詩一首

又

一牀共置朝回笏百屋常堆用剝錢何似吾家好兒子
吟哦相伴短檠前

初冬風雨驟寒作短歌

東園日淡雲容薄綸巾朝暮闌干角北風動地萬木號
不料一寒如此惡豈惟半夜雨打窓便恐明朝雪平壑

綠酒雖漓亦復醉
阜貂已弊猶堪著
所嗟此身老益窮
蹭蹬無功上麟閣
久從漁艇寄江湖
坐看烟塵暗幽朔
萬鞭枯觜憤未平
纛下老酋何足縛
要及今年墮指寒
夜擁雕戈度窮漠

余年二十時嘗作菊枕詩頗傳於人
今秋偶復采菊縫枕囊悽然有感

采得黃花作枕囊
曲屏深幌閤幽香
喚回四十三年夢
燈暗無人說斷腸

又

少日曾題菊枕詩
蠹編殘橐鎖蛛絲
人間萬事消磨盡
只有清香似舊時

陶淵明云三徑就荒松菊猶存
蓋以菊配松也
余讀而感之因賦此詩

菊花如端人獨立凌冰霜
名紀先秦書功標列仙方
紛零落中見此數枝黃
高情守幽貞大節凜介剛
乃知淵明意不為汎酒觴
折嗅三歎息歲晚彌芬芳

蕎麥初熟刈者滿野喜而有作

城南城北如鋪雪原野家家種蕎麥霜晴收斂少在家
餅餌今冬不憂窄胡麻壓油油更香油新餅美爭先嘗
獵歸爇火燎雉兔相呼置酒喜欲狂陌上行歌忘惡歲
小婦紅粧髻簪穗詔書寬大與天通逐熟淮南幾誤計
有自蜀來者因感舊遊作短歌

錦城如海行不極馬迹重重車轂擊家住城西三十年
聞說城東未曾識看花走馬宿中路經月酒徒無覓處

露香風暖海棠開，碧雞坊中倘相遇。
放翁顚顚鬢成絲，空有西遊千首詩。
今朝雨霽上危榭，意氣頗如年少時。
持盃欲作消愁計，酒未著人愁已醉。
不成題句寫幽情，一幅蛟綃空寄淚。

東吳女兒曲

東吳女兒語如鶯，十三不肯學吹笙。
鏡奩初喜穉蠶出，窓眼已看雙繭成。
庭空日暝花自舞，簾卷巢乾燕新乳。
阿弟貪書下學遲，獨揀詩章教鸚鵡。

雨夕

歲旱連夏秋客袂厭塵土欣然成一笑愛此清夜雨瓦
檠墮燈燼銅椀起香縷心清病良已境寂句欲吐東溪
久枯涸想像素蛟舞分喜到溝池遊魚命儔侶

晚遊東園

藥瓢藜杖合施行獨往山林已軟盟傍水斷雲含暮色
拂簷高竹借秋聲癡人自作浮生夢腐骨那須後世名
莫笑吟哦無闕日老來未盡獨詩情

小雨

小雨暗林塘寒聲遶畫廊事須求暫假宜睡稱燒香

事須

二字蓋唐人
公移中語也

初寒在告有感

埽地燒香興未闌一年佳處是初寒銀毫地綠茶膏嫩
玉斗絲紅墨瀋寬俗事不教來眼境閒愁那許上眉端
數櫺留得西窓日更取丹經展卷看

又

豪舉當年氣吐虹
即今顛顚一衰翁
寄懷本自俗塵外
移病何妨寒雨中
香暝候知銀葉透
酒清看似玉船空
故人吳蜀音塵斷
安得相攜一笑同

又

橫林吹葉水生洲
身落窮山古睦州
到枕雨聲酣旅夢
背窓燈影動清愁
氣衝星斗有孤劍
力挽棟梁無萬牛
未減匈奴身已老
此生虛負幄中籌

馬上作

白髮憑鞍一老翁出門漏鼓尚鼕鼕
淒涼旅思傳呼裏零落新詩假寐中
正苦文移來陸續何由笠釣入空濛
浮生正自少如意付與秋風吹斷蓬

冬夜聞角聲

嫋嫋清笳入雪雲白頭老守臥中軍
自憐到死懷遺恨不向居延塞外聞

又

憶在梁州夜雪深落梅聲裏玉關心
山城老去功名忤

臥對寒燈淚滿襟

塞上曲

茫茫大磧吁可嗟暮春積雪草未芽
明月如霜照白骨惡風卷地吹黃沙
駝鳴喜見泉脉出雁起低傍寒雲斜
窮荒萬里無斥堠天地自古重中華
青羶紅錦雙奚車上有姪人抱琵琶
何時漠北王庭靖千年萬年朝漢家

荊州歌

楚江鱗鱗綠如釀街尾江邊繫朱舫
東征打鼓挂高帆

西上湯豬聯百丈伏波古廟占好風武昌白帝在眼中
倚樓女兒笑迎客清歌未盡千觴空沙頭巷陌三千家
煙雨冥冥開橘花峽人住多楚人少土鎗爭響菜羹茶

冬夜讀書

挑燈夜讀書油涸意未已亦知夜既分未忍捨之起人
生各有好吾癖正如此所求衣食足安穩佳鄉里茆屋
三四間充棟貯經史四傍設几案坐倦時徙倚無聲九
韶奏有味八珍美寢飡籤帙間自適以須死豈惟畢吾

身尚可傳兒子此心何時遂感嘆歲月駛

寓歎

江上霜風透弊袍區區無奈簿書勞
衰遲始憶壯遊樂仕宦更知歸臥高
人怪羊裘忘富貴我從牛僧得賢豪
俗間問訊真成嬾有手惟堪把蟹螯

又

劔外歸耕夢不通公車上疏路何從
有心求縮地萬里無羽可朝天九重
狂誦新詩驅瘧鬼醉吹橫笛舞神龍

明當采藥玉霄去他日君看冰雪容

燕堂東偏一室頗深暖盡日率困於吏牘比夜乃

得讀書其間戲作

衮衮流年往匆匆短景過簾深上燈早地窄貯香多書
盡還重讀詩成更自哦向令無此處將奈旅愁何

又

賦性無他好開編喜欲迷齰齰傳夜漏喔喔待晨雞油
減玉蟲暗灰深紅獸低悠然撫書歎無術濟黔黎

又

永夜東窗裏人聲靜不譁衣篝起香穗書几落燈花爐
暖聽寒雨窓明送曉鷗文章空自苦白首不名家

懷鏡中故廬

臨水依山偶占家數間茆屋半欹斜雲邊腰斧入秦望
雨外舞蓑歸若耶從宦只思棄下澤忤人常悔讀南華
病來更怯還鄉夢頻驚簾泉試露芽

書感

丈夫本願脫世鞅，丹成晝日凌空飛。
纓冠佩玉朝紫微，白銀宮闕瞻巍巍。
不然萬里將天威，提兵直解邊城圍。
首薦滿川天馬肥，掩取不遣一騎歸。
苦心文章亦未非，與此二事同一機。
寥寥千載見亦稀，莊屈已死吾疇依。
哀哉窮子百家衣，豈識萬斛傾珠璣。
欲洗薄蝕還光輝，熟睨無力空歔歔。

對酒

新酥鵝兒黃，珍橘金彈香。
天公憐寂寞，勞我以一觴。
胸

中萬卷書老不施毫芒持酒一澆之與汝俱深藏生當
老窮巷死埋南山岡古來共如此已矣庸何傷

夢歸

老去無餘念時時夢弊廬細傾新釀酒盡讀舊藏書雲
崦鉏畬粟煙畦挽野蔬從渠造物巧賦芋戲羣狙

蜀使歸寄青城上官道人

輕別青城十二年至今客枕夢林泉一盃松屑坐前進
兩卷丹經肘後傳欲與公為塵外侶幾時身上峽中船

世間牛蟻何勞問輸與雲窓一粲然

上官常稱病憤對客一笑而已

寄城都蘧道人

賣藥錦城中燒丹雪山麓石竇取鵝管玉床收箭鏃紫
雲晨覆鼎白虹夜穿屋鬼神嚴厲守沆瀣勤沐浴此士
真可人高簡遺世俗江頭十年別顏色炯在目使來每
寄聲喜我淡無欲靈劑何必多分餉一黍足

寄邛州宋道人

宋與余在臨邛鴨翎鋪同
遇異人宋遂棄官學道

鴨翎鋪前遇秋雨獨與宋生棲逆旅坐門幃恍見老仙

劇談氣欲凌天宇袖中出劒秋水流血點斑斑新報仇
我醉高歌宋生舞洗盡人間千古愁老仙約我遊太華
是夕當醉蓮峯下語終冉冉已雲霄萬里秋風吹鶴駕
我今伶俚踐衰境不如宋生棄家猛西望臨邛一慨然
青松偃盡丹爐冷

小坐壁間張王子喬梅子真李八百許旌陽及近
時得道諸仙像每焚香對之因賦長句

山城作吏老堪羞衫色塵昏鬢色秋歛版那供新貴使

閉門聊與數公遊至人不死閱千劫大海無窮環九州
安得相攜從此逝醉騎丹鳳下玄洲

芳草曲

蜀山遠處逢孤驛缺甃頽垣芳草碧家在江南妻子病
離鄉半歲無消息長安城門西去路細靄斜陽芳草暮
尊前一曲渭城歌馬蹄萬里交河戍人生誤計覓封侯
芳草愁人春復秋只願東行至滄海路窮草斷始無愁

烏龍廟

江邊蒼龍背負天蟠踞千載常蜿蜒其前橫闢為大川
高城鼓角聲隱然龍廟於山家於淵世為吾州作豐年
老守雖愧筆如椽潔盃試賦迎神篇

寒夜移疾

南山北山高嶙峋朝雨暮雨斷江津時人正作市朝夢
老子已成雲水身希世強顏心自媿閉門謝病客生嗔
天公何日與一飽短艇湘湖自采蓴

湘湖在蕭山
縣產蓴絕美

又

走遍天涯白髮生
晚叨微祿臥山城
知章自識狂供奉
士季那容醉步兵
斲藥有時攜短鑱
奏書無路請長纓
此心擬說還休去
付與空堦夜雨聲

寒夜讀書

北窓暖焰滿爐紅
夜半濤翻古檜風
老死愛書心不厭
來生恐墮蠹魚中

又

韋編屢絕鐵硯穿
口誦手鈔那計年
不是愛書即欲死

任從人笑作書顛

又

憶昨從戎出渭濱
秋風金鼓震咸秦
鳶肩竟欠封侯相
三尺檠邊老此身

有為予言烏龍高嶮不可到處有僧巖居不知其
年予每登千峯榭望之慨然為作二詩

樵子向予說有僧巢翠微巖扉雲共宿
錫杖鶴同飛
日暮松明火天寒
榭葉衣棄官從此逝
非子尚誰歸

又

嶮絕無微徑淙潺有細流寒巖依作屋墮毳拾為裘木
客求相識毛人約共遊百年如一瞬塵世幾公侯

楊庭秀寄南海集

俗子與人隔塵劫何啻相逢風馬牛夜讀楊卿南海句
始知天下有高流

又

飛卿數闋嶠南曲不許劉郎誇竹枝四百年來無復繼

如今始有此翁詩

溫飛卿南鄉子九首
其工不減夢得竹枝

夜坐示桑甥十韻

好詩如靈丹不雜羶葷腸子誠欲得之潔坐被不祥食
飲屑白玉沐浴春蘭芳蛟龍起久蟄鴻鵠參高翔縱橫
開武庫浩蕩發太倉大巧謝雕琢至剛反摧藏一技均
道妙佻心詎能當結纓與易簣至死猶自強東山七月
篇萬古真文章天下有精識吾言豈荒唐

夢回

病骨便衾暖羈懷怯夢回鐘殘燈燼落香冷雨聲來老
抱憂時志狂非濟世材明朝入冬假燒兔薦新醅

醉中草書因戲作此詩

賜休暫解簿書圍醉草今年頗入微手挹凍醪秋露重
卷翻狂墨瘦蛟飛臨池勤苦今安有漏壁工夫古亦稀
穉子問翁新悟處欲言直恐泄天機

閒步至鞠場值小雪

倒盡床頭酒半罌笑呼筇杖共閒行梅花照水為誰瘦

雪片倚風如許輕
孟德遇冬思射獵
廣文垂老謝才名
歸來跨火西窓下
獨數城樓長短更

張季長學士自興元遣人來因詢梁益間事悵然有感

長記殘春入蜀時
嘉陵江上雨霏微
垂頭驢瘦悲鈴馱
截道狐奔脫獵圍
曉度市橋花欲語
晚投山驛石能飛
杜鵑言語元無據
悔作東吳萬里歸

東竺夜興

山城殘角伴疎鐘擁褐頽然一病翁
紙帳燈明蹙龜甲銅瓶火熟起松風
雨來尤覺睡味美酒後不知愁思空
忽憶江湖泊船夜號鳴避弋聞羣鴻

烏龍雪

烏龍如真龍安尾臥江磧時時登樓望
爪尾略可識今朝事大異千嶂忽如失
遙知重雲外已有雪數尺頗念采薇人
清坐焉得食裹飯欲問之矯首空峭壁
念昔故山時僵臥風雪夕靜聞長松折
聲若裂巨石天晴視巖

澗鳥獸死如積清夢不可尋撫楯三太息

曉出東城馬上作

曉出東城數幟紅蒙茸狐貉擁衰翁郊墟歉歲蕭條後
風雪窮冬慘淡中耐辱已慙非士節端憂未辦濟民窮
誕欺成俗真當懼誰挽天河一洗空

與建子振孫登千峯榭觀烏龍雪

二穉慧堪憐猶賒志學年能拋竹騾裹來看玉蜿蜒百
念寬身後餘生慰眼前善和書幸在它日要人傳

述懷

尺寸雖無補縣官此心炯炯實如丹
匈奴未滅敢愛死尊酒在前終鮮歡
亞父抱忠撞玉斗虞人守節待皮冠
縱言老病摧頽甚壯氣猶憑後代看

又

謗譽紛紛笑殺儂此身本自等虛空
大鵬境界纖塵裏曠劫年光掣電中
翻動煙霞長鑱在招呼風月一尊同
是凡是聖誰能測試問西隣織屨翁

禪家所謂睦州陳蒲鞵者故居在郡

治之西
二百步

到嚴十五晦朔郡釀不佳求於都下既不時至欲
借書讀之而寓公多祕不肯出無以度日殊惘
惘也

桐君放隱兩經秋小院孤燈夜夜愁名酒過於求趙璧
異書渾似借荊州溪山勝處真難到風月佳時事不休
安得連車載郛釀金鞭重作浣花遊

雨中獨酌

僻郡荒山下高坐寒雨中微波生酒綠短焰擁爐紅學
廢悲身老民窮祝歲豐厨人羞雉兔更憶喚隣翁

雉兔
登盤

頗懷
隣里

被酒徑臥比覺已五鼓矣

俗事驅人挽回經年無地濯氛埃酒酣稍覺客愁破
睡覺忽聞山雨來窓外樹寒無鳥宿壺中水暖有梅開
五更欲起先惆悵燭下文書已作堆

燈下讀玄真子漁歌因懷山陰故隱追擬

石帆山下雨空濛三扇香新翠簷蓬蘋葉綠蓼花紅回
首功名一夢中

又

晴山滴翠水按藍聚散漁舟兩復三橫埭北斷橋南側
起船篷便作帆

又

鏡湖俯仰兩青天萬頃玻瓈一葉舩拈棹舞擁蓑眠不
作天仙作水仙

又

湘湖煙雨長
蓴絲菰米新炊滑
上匙雲散後
月斜時
潮落舟橫醉不知

又

長安拜免幾公卿
漁父橫眠醉未醒
煙艇小釣車腥
遙指梅山一點青

送客至望雲門外

冬溫頻作雨
晨冷頓催晴
嫩日滿江驛
淡煙籠郡城
憂

民懷凜凜謀已耻營營投檄真須決隣翁約耦耕

題城南堂

故人陳亦顏少游四方晚乃卜居臨安城南因以城南名其堂屬余賦詩

山林恨與親友別朝市不堪車馬喧陳子調高無俗客
一廛却要近修門

又

借問城南老居士新年樂事復何如春寒催喚客嘗酒
夜靜臥聽兒讀書

故山葛仙翁丹井有偃松覆其上天矯可愛寄題

葛翁煉丹一千年翁去丹飛餘此泉炯如古鏡不拂拭
俯聽缺甃時鏘然老龍受命護泉臥蜿蜒直恐從天墮
人言神物老愈靈夜半聲酣風雨過放翁還山亦何有
閉門吟歎龍為友客來相對聊曲肱但酌此泉勝酌酒

估客樂

長江浩浩蛟龍淵浪花正白蹴半天軻峨大舩望如豆
駭視未定已至前帆席雲垂大隄外纜索雷響高城邊
牛車犇犇載寶貨磊落照市人爭傳倡樓呼盧擲百萬

旗亭買酒價十千公卿姓氏不曾問安知孰秉中書權
儒生辛苦望一飽趑趄光範祈哀憐齒搖髮脫竟莫顧
詩書滿腹身蕭然自看賦命如紙薄始知估客人間樂

楚宮行

漢水方城一何壯大路竝馳車百兩軍書插羽擁修門
楚王正醉章華上璇題藻井窮丹青玉笙寶瑟聲冥冥
忽聞命駕遊七澤萬騎動地如雷霆清晨射獵至中夜
蒼兕玄熊紛可藉國中壯士力已殫秦寇東來遣誰射

妾命薄

太白作此篇言長門宮事予反之

妾命薄早入天家侍帷幄君王勤儉省宴游寶柱朱弦
塵漠漠日長別殿承恩稀肝旻猶聞親萬機宮中雖無
珠玉賜塞上不見煙塵飛不須悲傷妾命薄命薄却令
天下樂

晚登千峯榭

只道文書無了日也能擺撥上層臺窓明山雪暮方作
露白野梅寒未開老病真慚天下士窮愁強覆掌中盃

兒曹莫怪憑闌久得句何妨秉燭回

晝睡

書獄徵租自笑忙暫歸聊得憩匡床屏圖夜雨孤舟句

枕帶秋風九日香

方睡菊
花枕

一卷蠹書棲倦手數聲殘角

報斜陽清泉浴罷西窓靜更覺茶甌氣味長

胸次鬱鬱偶取枯筆作狂草遂成長句

酒隱人間六十年晚途斂板自傷憐莊周聊寄漆園吏
梅福終為吳市仙方外酒徒盟尚在囊中劒術老當傳

此心鬱屈何由豁聊遣龍蛇落蜀牋

休日與客燕語既去聽小兒誦書因復作草數紙

賜沐家居謝掾曹暫將蕭散慰勤勞琅琅應節兒書熟

疊疊生風客論高玉屑名牋來濯錦風漪竒石出臨洮

託盟翰墨吾安敢揮灑淋漓自足豪

張季長寄洮研何元立寄蜀紙皆近

到新定

青城大面山中有二隱士一曰譙先生定字天授

建炎初以經行召至揚州欲留之講筵不可拜

通直郎直祕閣致仕今百三十餘歲巢居嶮絕
人不能到而先生數年輒一出至山前人有見
之者其一曰姚太尉平仲字希晏靖康初在圍
城中夜將死士攻敵營不利騎駿驟逸去建炎
初所在揭榜以觀察使召之竟不出淳熙甲午
乙未間乃或見之於丈人觀道院亦年近九十
紫髯長委地喜作草書蓋皆得道於山中云偶
成五字二首託上官道人寄之

寄謝譙夫子今年一出無萬緣隨夢斷百念與形枯雲
護巢松谷神呵嘏藥爐憑高應念我白首學徵租

右寄譙先生

太尉關河傑飛騰亦遇時中原方蕩覆大計易差池素
壁龍蛇字空山熊豹姿煙雲千萬疊求訪固難知

右寄姚太尉

累日多事不復能觀書感歎作此詩

我生無它長所得靜而簡出仕三十年不殖一金產四

方到為家所向不容揀南遊極巨海西戍掠危棧為州
亦何好且復占仕版俸不給淖糜況敢事酒琰晨興坐
堂上符檄高巉巖藏書三萬軸一字不到眼胸中積磊
塊歎息誰為鑪浮生固如此正可付一莞

北窓

雲開見山雪院靜聞松風吏去曲肱臥疑非塵世中

讀范文正瀟灑桐廬郡詩戲書

桐廬朝暮苦匆匆瀟灑寧能與昔同堆案文書生眼黑

入京車馬漲塵紅
逢迎風月麴生事
彈壓江山毛穎功
二子年來俱埽迹
頽然堪笑一衰翁

筭中偶得去年二月都下數詩

昨佩魚符入鳳城
春風處處聽鶯聲
欲尋舊友半為鬼
重到西湖疑隔生
浮世正如投六簿
野人何意慕三旌
嚴州戍滿真當老
猶幸為民死太平

感寓

人生堂堂七尺身
本與聖哲均稱人
唐虞乃可讓天下

光被萬世常如新
哀哉末俗去古遠
斷喪太朴澆全淳
豆羹簞食輒動色
攘竊乃至忘君親
錙銖必先計利害
詎肯冒死求成仁
不欺當從一念始
自古孝子為忠臣

征婦怨效唐人作

萬里安西久宿師
東風吹草又離離
玉壺貯滿傷春淚
錦字挑成寄遠詩
擊虜將軍方戰急
押衣敕使尚歸遲
粧臺寶鏡塵昏盡
髮似飛蓬自不知

雪

瘴癘家家一洗無更欣餘潤沃焦枯花壺夜凍先除水
衣焙朝寒久覆爐松頂積高時自墮竹枝壓重欲相扶
雲開正值春風早却看晴光滿九衢

寒夜

思飲酒不果與緯
同嗽藥渣魚戲作

我老畏作病盃酒久不持讀書寒雨中比夕頗思之呼
童欲洗酌顧以病自疑清坐歎寂寞痛飲愁淋漓三爵
醒醉間此理當徐思一掬琴高魚且復伴吾兒

縱筆

凍研笑臞儒離弓隱獵徒不成平趙魏正可老江湖顚
顛頭雖秃輪囷膽尚麤咸陽呼五白何遽不能盧

又

故國吾宗廟羣羌我寇讎但應堅此念寧假用它謀望
駕遺民老忘兵志士憂何時聞遣將往護北平秋

歲晚盤尊索然戲書

經年薄宦客桐廬市邑蕭然一物無名酒不來惟飲濕
長魚難覓且焚枯支離鶴骨寒添瘦宛轉龜腸夜自呼

更與兒曹同一笑燈前短褐拆天吳

立春前四日謝雪方拜天慶庭中雪復作

珮玉珊珊謁衆真竟煩一雪慰疲民未看舞鶴隨飛蓋
先喜飄花集拜茵耕墾土膏千耦出市樓酒賤萬家春
使君老去悲才盡詩句難追節物新

桐江行

我来桐江今幾時面骨崢嶸鬢如雪怒嗔不復有端緒
讒謗何曾容辨說十年山棲却火食釀桂餐芝自芳潔

作官一飽仰紅腐坐對盤飧常嘔噎雪晴宿戒南山遊
剗要賦詠臨清流將行復輟却退坐臺符吏牘令人愁
胸中崔嵬向誰吐獨立憑高時自語文章當以氣為主
無怪今人不如古

屢雪二麥可望喜而作歌

苦寒勿怨天雨雪雪來遺我明年麥三月翠浪舞東風
四月黃雲暗南陌坐看比屋騰歡聲已覺有司寬吏責
腰鎌丁壯傾閭里拾穗兒童動千百玉塵出礫飛屋梁

銀絲入釜須寬湯寒醅發劑炊麴裂新麻壓油寒具香
大嬪下機廢晨織小姑佐庖忘晚粧老翁飽食笑捫腹
林下擊壤歌時康

丁未除夕前二日休假感懷

掛冠神武莫躊躇家具何妨載鹿車怨謗相棄真市虎
技能已盡似黔驢黃金散後猶耽酒白髮生來更愛書
新歲定尋林下約一觴一詠未成疎

又

夢寄梅村竹塢間不堪客裏見春還
潮生水欲通南澗
雪霽雲猶冒北山
病思過年應小減
官身得假未全閒
變名吳市男兒事
末路低回自笑孱

假中閉戶終日偶得絕句

雨聲滴滴暮未已
苔暈重重寒更添
知是使君初睡起
清香一綫透疎簾

又

老夫昔是青城客
酒肉淋漓豈本心
還我山家本來面

數拳春筍薦孤斟

伏錫山寄筍枯
一名筍兒拳

又

官身常欠讀書債
祿米不供沽酒資
剗喜今朝寂無事
焚香閒看玉谿詩

除夜雪

只怪重衾不禦寒
起看急雪玉花乾
遲明欲謁虛皇殿
廐馬蒙羶立夜闌

又

北風吹雪四更初嘉瑞天教及歲除

戊申元日
卯初立春

半盞屠

蘇猶未舉燈前小草寫桃符

戊申元日

白頭身世歎羈孤一念兒時淚已濡尚記爭先書鬱壘
豈知落後舉屠蘇盃盤草草思隣舍車馬紛紛厭九衢
六十年非心自了掛冠猶足補東隅

初春感懷

關河謝遠遊歲月迫歸休敢恨驥伏櫪但思狐首丘雪

明窓誤曉霜點鬢驚秋羈旅饒愁思誰憐季子裘

閉閣

閉閣孤城賸放慵桐江清絕勝吳松雲收忽見北山雪
月落正聞西寺鐘世味老來無奈薄土思病後不勝濃
尊羹豈止方羊酪輕許平生笑士龍


潺湲閣小立

飽食何曾補縣官潺湲閣上倚闌干水紋靴皴風初緊
花色鞵紅露未乾薄酒愁邊供醉醒故人夢裏話悲歡

孤城正在山窮處過社今朝尚爾寒

睡起至園中

欲掛衣冠萬事輕不妨小住向山城
綠尊耐久常相伴
雪鬢纔生便放行拂枕時時覓幽夢
倚闌日日聽新鶯
夕陽更有欣然處來看青郊雨後耕



劔南詩藁卷十九

欽定四庫全書

集部

劔南詩藁卷二十一

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷二十

宋 陸游 撰

上書乞祠

上書又乞奉祠歸夢到湖邊自叩扉此去敢辭依馬磨
向來真慣擁牛衣致身途遠年齡莫報國心存氣力微
誓墓那因一懷祖人間處處是危機

春殘

老墮空山裏春殘白日長庸醫司性命俗子議文章燭
映一池墨風飄半篆香箇中有佳處袖手看人忙

三月二十日晚酌

暫因賜沐作閒身太息纔餘一日春委地落花新著雨
穿簾歸燕不生人衛青此日怪長揖王翰當年謀卜鄰
商畧晚窗須小醉朱櫻青店正嘗新

次前韻

烏帽紅塵過去身荒山野水又經春殘年欲盡初聞道

薄宦宜休不問人一局枯碁忘日月數斟濁酒約比鄰
石帆山下菱歌斷未歎臨風白髮新

北窗閑詠

陰陰綠樹雨餘香半捲疎簾置一牀得祿僅償賒酒券
思歸新草乞祠章古琴百衲彈清散名帖雙鉤搨硬黃
夜出灞亭雖跌宕也勝歸作老馮唐

休日留園中至莫乃歸

儘道官身屬太倉未妨寄傲向林塘綠波春漲羣魚樂

清露晨流蔓草香閒試名弓來射圃醉盤驕馬出毬場
長城萬里知誰許看鏡空悲兩鬢霜

北窗病起

一飢可忍萬緣輕況復幽窗疾漸平更事天公終賞識
欺人鬼子漫縱橫道邊塵起頻障扇門外波清刺濯纓
不為褊心憎薄俗客星祠下是歸程

自東津泛舟至桐溪

潮生東西津雨暗上下塢蕭蕭亂菰蒲拍拍起鳬鴨吾

船雖褊小尚可著一榻溪風吹醉頰高枕墮紗幘南山
浮濕翠偃蹇呼不答安得青蓮公傑句為彈壓

逐客至大浪灘上

小龍瓜蔓綠短籬梅子黃曉風掠水來吹我醉面涼平
生蕭散意未覺將迎忙溪山供一笑客主可相忘寧當
倒手版聊復據胡床太平豈無象麥飯家家香我歸亦
何有養氣猶軒昂那因五斗陳坐變百鍊剛

郊行

小雨東郊氣象新
蕭蕭清吹爽衣巾
並谿密竹巧藏寺
夾道新麻高沒人
老厭簿書愁欲睡
病疎盃酌渴生塵
桐君山路無多遠
元自知津莫問津

夏雨

東風吹雨溪上來
北山出雲以應之
嚴州城中三日雨
朝暮點滴無休時
向來秧底乾欲裂
白水漫漫俄盈陂
豚肩覆豆巫醉飽
龍骨挂壁農遨嬉
今年蠶麥收數倍
繭大如瓮麥兩岐
西成在眼又如此
還鄉鼓腹歌淳熙

時去受代
纔四十日

雨中作

礎潤雲生五月中
山城細雨晚空濛
讀書雖恨此身老
把酒尚思吾輩同
積潤畫圖昏素壁
漬香衣幘覆熏籠
新晴不用占鍾鼓
卧聽林梢淅淅風

醉題

不學空門不學仙
清樽隨處且陶然
人情正可付一笑
生世元知無百年
白首難陪東閣客
清風自足北窗眠

歸耕只要無人問安用文章海內傳

有懷青城霧中道友

雪谷孤松自鬱然紛紛朝菌但堪憐坐更拂石芥城劫
時說開皇龍漢年淡煮藜羹天送供閒拖藤杖地行仙
共看王室中興後更約長安一醉眠

梅雨初晴迓客東郊

霽色澄鮮已斷梅江郊隱隱尚輕雷層巒正對孤城落
健席遙看大艫來幼婦髻鬟簪早稻近村坊店賣新醅

吾行在處皆詩本錦段雖殘試剪裁

晚歸

暑雨初晴日江臯欲暮天鴉棲沙際樹人喚渡頭船病
骨羸將折昏眸困欲眠市橋燈火鬧且復喜豐年

休日登千峰榭遇大風雨氣象甚偉

今日逢休沐憑高且暫閒風聲初捲野雨氣已吞山疾
病臨觴嬾塵埃得句慳西征忽在眼河勢抱函關

雨中獨坐

馬目山頭雨脚昏
龍津橋下浪花翻
年豐郡僻無公事
一炷清香晝掩門

舊識姜邦傑於亡友韓无咎許近屢寄詩來且以

无咎平日倡和見示讀之悵然作此詩附卷末

須溪本作巖
州贈姜梅山

故人玉骨已生苔
謂南澗公邂逅逢君亦樂哉
湖寺繫舟無

夢去京塵馳騎有詩來
醉中不敢教兒誦
看處常須浴手開
久矣世間無健筆
相期力幹萬鈞回

釣臺見送客罷還舟熟睡至覺度寺

抽身簿書中茲日睡頗足縹緲桐君山可喜忽在目紛
紛衆客散杳杳一筇獨昔如脫淵魚今如走山鹿詩情
森欲動茶鼎煎正熟安眠簟八尺仰看帆十幅逍遙富
春飯放浪漁浦宿送老水雲鄉羹藜勿思肉

泛富春江

雙艣搖江疊鼓催伯符故國喜重來秋山斷處望漁浦
曉日昇時離釣臺官路已悲捐歲月客衣仍悔犯風埃

還家正及雞豚社剩伴鄰翁笑口開

宿漁浦

東歸剡曲只三程旅泊還如萬里行
燈影動搖風不定船聲韉轂浪初生
曳裾非復白頭事瞑目那求青史名
歸去若為消莫境一蓑煙雨學春耕

泝小江飯舟中

老作孤舟客秋濤漲小江林昏見飛鱗
村近有驚鳧天濶三更月篷低一尺窗
魚殮雖草草聊喜到吾邦

乞祠久未報

聖朝未許領鼓祠擁褐清羸不自支
鄧禹有靈應笑拙
周公無夢固知衰
得閒要及身安日到死應無睡足時
七百日來塵滿抱今朝湔袂有新詩

七月十日到故山削瓜瀹茗脩然自適

鏡湖清絕勝吳松
家占湖山第一峰
瓜冷霜刀開碧玉
茶香銅碾破蒼龍
壯心自笑老猶在
狂態極知人不容
擊壤窮閭歌帝力
未妨堯舜亦親逢

曉興

亂蟬鳴新秋老木立清曉我亦岸綸巾寄傲萬物表大
千歲粒粟浩劫過飛鳥癡子居其間利欲自纏繞可憐
榮進意未白蓋棺了浮名更嚇鬼白堊寫丹旒我於斯
世事看破自少小老矣更何求歸哉憩林沼

感秋

會稽八月秋始涼梧桐葉落覆井床月明縞樹遶驚鵲
露下濕草啼寒蛩丈夫行年過六十日月雖短志意長

匣中寶劍作雷吼，神物那得終摧藏。
君不見昔時東都宗大尹，義感百萬虎與狼。
疾危尚念起擊敵，大呼過河身已僵。
宗汝霖垂死尚部勒諸將北伐忽大呼過河者三隨即殞絕

秋夜有感

候蟲何唧唧，歲晚聲出壁。
不惟嬾婦驚，感此白頭客。
壯年事征戍，萬里不得息。
揚颿凌秋濤，策馬赴山驛。
日照蛟鼉涎，雪印豺虎迹。
誰知七尺軀，幸脫九死厄。
前年補畿郡，入對瞻玉色。
報恩無死所，再拜衰淚滴。
即今故山

歸愈歎老境逼不眠中夜起仰視星歷歷中原何時定
銅駝卧荆棘滅敵恨無人有復不易識

五鼓入城

道旁竹樹露如傾帶睡悠悠十里行曉色未分煙尚重
壓城樓閣已崢嶸

飯罷忽隣父來過戲作

旋炊香稻鬻新菰飯飽逍遙樂有餘茶味森森留齒頰
香煙醺醺著圖書毛皮尚在寧知我鱗甲深藏莫問渠

賴有鄰翁差耐久雨畦頻喚共攜鉏

秋夜讀書

一雨濯殘熱秋氣忽已深青燈照空廊重露滴高林危
坐讀周易會我平生心夜分徐掩卷閒弄床上琴簾外
初斜河屋頭已橫參人生每如此利欲安能侵

夜坐忽聞村路報曉鐵牌

何人叩鐵警農耕炊飯家家起五更也似早朝風雪裏
遙聽宮漏下宮城

又

秋氣淒涼霧雨昏
老書生病卧孤村
五更不用元戎報
片鐵錚錚自過門

白雲自西來過書巢南窗

岷山千里青未了
恨隔長江不到吳
羈雲冉冉吾舊識
安得挽之來坐隅

贈竹十韻

放翁小築湖西偏
虛窗曲檻無炎天
人間乃有真富貴

遶舍十萬碧玉椽連林娟娟泣清露高枝裊裊搖蒼煙
常憂俗客觸新粉屢戒園丁傷逸鞭涼生尊罍消午醉
聲撼窗扉驚晝眠春殘斲土得美茁氣壓鄉相食萬錢
爾來作吏若墮穽每一夢到心悽然還家再見却惆悵
塵土何地從臞仙囊中幸藏餐玉法欲屏萬事相周旋
更當待月出東嶺坐石泠泠揮響泉

雜感

自古文章與命仇功名身外更悠悠一從識得元無事

窮死逢人不說愁

又

小軒幽檻雨絲絲
種竹移花及此時
客去解衣投卧榻
半醒半醉又成詩

又

少年意氣與春爭
朱彈金鞭處處行
誰信即今空谷裏
旋租黃犢學躬耕

又

自洗銅壺試玉醅小軒風月為徘徊此心未與年俱老
猶解逢花眼暫開

又

側帽垂鞭小陌東名花迎笑一枝紅啼鴛驚斷尋春夢
惆悵新霜點鬢蓬

入城寓榻開元

羸僮倦馬困長堤借榻禪房日未西熟睡覺來閒隱几
庭楸陰轉乳鴉啼

夜出偏門還三山

月行南斗邊人歸西郊路水風吹葛衣草露濕芒履漁
歌起遠汀鬼火出破墓淒清醒醉魂荒怪入詩句到家
夜已半佇立叩蓬戶穉子猶讀書一笑慰遲莫

四鼓酒醒起步庭下

酒解夜過半出門步中庭天高河漢白月淡煙霧青重
滴竹杪露踈見樹罅星壞甃啼寒螢深竹明孤螢秋晚
雖未霜蠹葉時自零四序逝不留慨然感頽齡平生茅

一把不博帶萬釘鵝溝謝拍拍鴻路追冥冥

感憤秋夜作

月昏當戶樹突兀風惡滿天雲往來太阿匣藏不見用
孤憤書成空自哀吾輩赤心本貫日昔人白骨今生苔
滎河溫洛不可見青海玉關安在哉

反感憤

明夜讀前作而悲
乃復作此自解

膊膊庭樹雞初鳴嗷嗷天衢雁南征百年朝露豈長久
萬事浮雲常變更出處有心終有愧聖賢無命亦無成

西疇雖薄可自力雙犢且當乘雨耕

東叅

著脚紅塵已恨深便應畢世住山林貴人自作宣明面
老子曾聞正始音議論坐狂當永棄簿書緣病復難任
東叅幽寂憑誰畫開幔床橫一素琴

雨夜四鼓起坐至明

門巷冷如冰生涯淡似僧小窗愁夜雨孤影怯秋燈林
鵲棲仍起山童喚不應悠然坐待旦息倦倚書牕

夜讀兵書

八月風雨夕千載孫吳書老病雖憊甚壯氣頗有餘長
纓果可請上馬不躊躇豈惟鑒臯蘭直欲封狼居萬乘
久巡狩兩京盡邱墟此責在臣子憂愧何時攄南鄭築
壇場隆中顧草廬邂逅未可知旄頭方掃除

老嘆

百年逝不留萬事本難料夜行鐘漏迫但取賢達笑頗
疑功名事造物付年少歸休莫問人曉鏡勤自照

秋霽

灝氣明山川霽色滿天地西風吹我衣忽有萬里意中
原運當平所要在得士餘年猶幾何棄置復棄置

絲中聞急雨

一味疎慵養不才飯蔬亦已罷銜盃衡茆終日人聲絕
卧聽芭蕉報雨來

老病追感壯歲讀書之樂作短歌

少年志力强文史富三冬但喜寒夜永那知睡味濃庭

樹風浙浙城樓鼓鼙鼙自鞭不少貸凍坐聞晨鐘探義
劇攻玉擣文笑雕龍落紙筆縱橫圍坐書疊重得意自
吟諷清悲畲莎蛰飢腸得一甌美如紫駝峰俯仰五十
年于世終不逢夜半起飯牛頽然成老農束書不更讀
蠹簡流塵封世無袁伯業太息吾何從

閒中戲書

糲飯從來不願餘還山喜遂此心初挽河盡洗彈冠念
閉戶閒讐挿架書一榼不妨從客飲數椽也復是吾廬

少游細看猶多事安用人間下澤車

又

少年拜舞綴庭紳曾見中天日月新金印終歸妄校尉
白頭仍是斥仙人修營香火三生願收拾風波九死身
豈但漁樵與爭席海邊漚鳥亦相親

又

釣竿風月寄滄洲醉髮髣髴荻葉秋仕進世誰知我嬾
功名命不與人謀衰遲更覺歲時速踈賤空先天下憂

病骨未銷讒未已聊須周易著牀頭

采藥

簣子編成細箬新獨穿空翠上嶙峋丹砂巖際朝暾日
枸杞雲間夜吠人絡石菖蒲蒙綠髮纏松薜荔長蒼鱗
金貂謁帝我未暇且作人間千歲身

過猷講主桑瀆精舍

寂莫衡門傍水開放翁曳杖此徘徊林疎時見釣篷過
風急忽聞菱唱來講罷繩床懸麈柄坐餘童子供茶盃

解衣許我閒摩腹又作幽窗夢一回

自桑瀆泛舟歸三山

端為身閒覺日長不嫌兒輩笑清狂湖光潏潏歸舟疾
雨點霏霏醉頰涼斷約苔生人喚渡孤村霜近稻登場
宦情不獨今年薄游子從來念故鄉

訪野人家

山入柴門穿橋通野路長羣童挑燕筍幼婦采雞桑淳
古非今俗留連到夕陽盤飧敢辭飽滿箸藥苗香

塞上曲

秋風獵獵漢旗黃
曉陌霜清見太行
車載氍毹廬駝載酒
漁陽城裏作重陽

又

將軍許國不懷歸
又見桑乾木葉飛
要識君王念征戍
新秋已報賜冬衣

又

金鼓轟轟百里聲
繡旗寶馬照川明
王師仗義從天下

莫道南兵夜斫營

又

老矣猶思萬里行
翩然上馬始身輕
玉關去路心如鐵
把酒何妨聽渭城

硯湖 并引

余得英石數峰環立其中四處可容一龕因以
瀦水代硯滴名之曰硯湖且為賦詩

羣山環一湖湖水綠溶漾
微風掠窗過亦解生細浪
餘

流浸翠巖倒影寫青嶂自然出天工豈復煩巧匠病夫
屏盃酌不遣運酒舫時時挹清泚筆墨助豪宅帖成龍
蛇走詩出雷雨壯從今几硯旁一掃蟾蜍樣

泛湖

筆牀茶竈釣魚竿潏潏平湖淡淡山浪說枕戈心萬里
此身常在水雲間

寓蓬萊館

桐葉吹殘蕉葉黃驛窗微雨送淒涼長安許史無平素

莫恨棲棲立路旁

又

古驛蕭蕭獨倚闌
角聲催晚雨
催寒殘
年遇合應無日
猶說新豐強自寬

夜還驛舍

樓上颼颼初發更
斷雲收雨旋成晴
市橋新漲搖燈影
驛路殘泥壯屐聲
闐闐變遷非曩日
情懷牢落感餘生
高秋病起猶能醉
剗買官醅樂太平

舟中大醉偶賦長句

過江何敢號高流偶與俗人風
馬牛畫楫新搖嚴瀨月
清尊又醉戴溪秋壯心無復在千里
老氣尚能橫九州
古寺試求三丈壁為君驅筆戰蛟虬

行飯至新塘夜歸

門前徙倚尚餘霞湖上歸來月滿沙
雲濕一聲新到雁
林昏數點後棲鴉淒迷籬落開寒菊
鄭重比隣設夜茶
早議挂冠君會否莫年心念不容差

雲門感舊

總角來遊老未忘
背人歲月去堂堂
穉松看到偃霜蓋
廢寺憶曾開寶坊
佛几古燈寒焰短
齋厨新粟午炊香
興闌未忍登車去
更倚溪橋立夕陽

若耶溪上

微官元不直鱸魚
何況人間足畏途
今日溪頭慰心處
自尋白石養菖蒲

又

九月霜風吹客衣
溪頭紅葉傍人飛
村場酒薄何妨醉
旅正堪烹蟹正肥

秋雨頓寒偶書

羈懷不醉昏昏卧
對青燈獨掩門
沙雁帶寒來古澤
林鳩催雨暗孤村
數椽蟹舍償初志
九陌塵衣洗舊痕
自歎一生書裏活
莫年無力濟黎元

新晴泛舟至近村偶得雙鰕而歸

秋風一夜老汀蘋
剡曲稽山發興新
青嶂曾為身後塚

扁舟聊作畫中人園林搖落知寒早父老逢迎覺意真
歸舍不妨成小醉眼明細柳貫霜鱗

上書乞祠輒述鄙懷

干祿本代耕窮達敢自必早遇高皇帝九品對宣室
憂懷犬馬心嫠緯不暇恤上恩等天地腰領免斧鑕旋屬
紹興末暘谷瞻出日賤臣復何幸便殿首造膝煌煌帝
堯典推擇首秉筆愚忠雖懇款野性實坦率飄然去周
行湖海抱沉疾遠遊客窮塞亭障秋蕭瑟聖君終記省

萬里忽棄馭同朝久凋謝存者不十一
造廷故抱暗下殿衰涕溢蹉跎又十載
憂患豈易述流年不貸人白髮日夜密
冠雖未即挂馭已不容叱尚覬公朝恩
養老霑散秩閉門教子孫志願真永畢

泛湖上雲門

三百里湖秋渺然是間可以著釣船
浩歌莫過石帆下

爛醉夜泊樵風邊

樵風湮在若耶溪鏡湖之間

茫茫沙月忽側墮裊

裊山氣時孤騫冥鴻遠舉謝斯世白鷗自放全其天
幽

棲幸脫市朝，械捷徑邨著功名鞭。人生各自適意耳，稷禹巢許知誰賢。

書歎

世態秦欺楚，交情越視秦。寧教待羝乳，不耐望車塵。書積高圍坐，花繁亂插巾。那須散人號，已是葛天民。

枕上作

寒夜卧林廬，蕭然適有餘。蟲悲號壞壁，燈暗守殘書。養拙天知我，安貧老似初。雖非漆園吏，也作蝶蘧蘧。

老病無復宦情或者疑焉作此示之

病思蕭條豈獨今十年前已鬢霜侵舊交畧盡形吊影
薄宦宜休口語心老驥已甘當伏櫪窮猿況是急投林
別君徑入亂雲去後日相思何處尋

拄杖

放翁拄杖具神通蜀棧吳山興未窮昨夜夢中行萬里
蓮華峰上聽松風

北望

北望中原淚滿巾黃旗空想渡河津丈夫窮死由來事
要是江南有此人

歲晚感懷

利名爭奪兩皆非生世寧殊露易晞老冉冉來誰獨免
冢纍纍處會同歸聽歌莫惜終三疊縱獵何妨更一圍
醉卧日高呼不醒笑人霜曉束朝衣

大雨中作

北風撼山勢岌岌老夫倚杖檐前立貪看白雨掠地風

飄灑不知衣盡濕當年入朝甫三十十丈邊塵叩江急
屬聞蠟彈遣檄書亟壞布裳縫袴褶即今白髮不可數
破屋頽垣窘風雨汝生汝死問者誰人雖不問心自悲
繫舟平水步

舟尾參差野岸橫屐聲穿市得閒行雨昏茆店炊煙濕
人語蓬窗續火明枝上橙香初受摘擔頭菰脆正堪烹
漁樵自是平生意不為衰遲薄宦情

初到行在

六十之年又四年也騎瘦馬趁朝天首陽柱下孰工拙
從事督郵俱聖賢筆墨有時閒作戲功名到底是無緣
都城處處園林好不許山翁醉放顛

還都

平生薄名宦所願得早休奔走三十年鏡中霜鬢秋歸
踏長安道恍然皆舊遊處處見題名始驚歲月道西湖
隔城門放浪輸白鷗當時見種柳已足繫巨舟挂冠當
自決安用從人謀勿以有限身常供無盡愁

宿監中偶作

流落歸來兩鬢絲此生真媿北山移
數殘宮漏寒無寐
開盡梅花病不知同舍破甘醒宿酒
故人折簡索新詩
生涯可笑清如許枉是京塵撲馬時

譚德稱有
簡催和詩

四鼓出嘉會門赴南郊三宮

客遊梁益半吾生不死還能見太平
初喜夢魂朝帝所
更驚老眼看都城九重宮闕晨霜冷
十里樓臺落月明
白髮蒼顏君勿笑少年慣聽舜韶聲

題張野夫監簿大招圖

此生只合老漁樵扶病誰令趁早朝
開卷未終三太息羈魂零落恐難招

簡譚德稱監丞

廣都江上送舟行淚灑春風別少城
冉冉幾經新歲律依依猶有舊交情
塵冠當挂彈何用革帶頻移瘦自驚
剡欲約公風雨夜一燈相對話平生

致齋監中夜與同官縱談鬼神效宛陵先生體

五客圍一爐夜語窮幻怪或誇雷可斫或笑鬼可賣或
陳混沌初或及世界壞或言修羅戰百萬起睚眦餘談
恣搜抉所出雜細大風雲墮皮幘幽坎窺鐵械羣號起
古聚孤泣出空解妖狐冠髑髏掩袂弄姿態空轡伏逸
囚夜半出竊嘖雖云多聞益頗犯綺語戒不如姑置之
投枕休困憊明當掛祠衣僕僕愁亟拜

夜歸

飲酒不盡觴觀棋不竟局索馬踏街鼓仰視月挂木疾

馳沿河隄不記幾坊曲到家四鄰寂徃徃睡已熟天香
餘裊裊佛燈猶煜煜中庭雖一席緩步意亦足寒犬吠
荆籬棲鵲起鼓竹市聲從北來始覺非林谷却尋西窗
書開卷剪殘燭官閒居更遠一笑謝羈束

次韻鄭唐老

官遊早日闕相聞一面那知乃爾勤秋釣清灘方入夢
曉穿細仗又逢君驟看落筆驚風雨便擬同舟卧水雲
作意歸休還會否莫年無力起斯文

五鼓赴太社臘祭

霜寒裂屋瓦月白射坊門
病骨愁看影孤吟怯斷魂
飢鷹掣羈紲老馬伏車轅
不奈清宵夢殘蕪滿故園

己酉元日

夜雨解殘雪朝陽開積陰
桃符呵筆寫椒酒過花斟
巷柳搖風早街泥濺馬深
行宮放朝賀共識慕堯心

以亮陰免

賀禮

送潘德久使薊門

崑崙東分一枝渾犇蹴砥柱經龍門羲皇受圖撫上古
神禹治水開中原三靈實扶藝祖業萬國共仰東都尊
羣兒撞壞吁可歎顧使殘敵今遊魂因君試求出師路
孟津白馬應如故不須更議繫河橋北風正可塞冰渡
頗聞塞外已數盡復道飛狐合屯戍轅門倘駐拂雲祠
烽火應過明妃墓君歸解鞍藉芳草細談塞北忘予老
讀書飲酒待敵平萬丈參旗方下掃

我夢

我夢入煙海初日如金鎔赤手騎怒鯨橫身當渴龍百
日京塵中詩料頗闕供此夕復何夕老狂洗衰慵夢覺
坐歎息杳杳三茆鍾車馬動曉陌不竟睡味濃平生擊
敵意裂眦髮上衝尚可瘞一障憑堞觀傳烽

晨起有感

痛飲可以豪謝病可以高計之顧不審老與世俗鏖丈
夫本自許四十擁旌旄上馬不回顧賊穴窮腥臊渭橋
耻未雪孰謂弓可橐此志竟悠悠徂歲行滔滔一官客

長安燭下束弊袍
豈惟歎龍鍾
行恐悲君蒿
吾曹議古
人後亦觀
吾曹浮雲
易變滅
公議終堅牢

南省宿直

檐角參差散暮霞
重門鎖斷市聲譁
風經綠樹鴉棲穩
月入空廊柱影斜
藤紙靜臨新獲帖
銅瓶寒浸欲開花
誰知今夕幽窗夢
又榜扁舟上若耶

又

頽然靜對北窗燈
識字農夫有髮僧
但遣奚奴持古錦

何須侍史護青綾
塵埃犇走無由息
疾病侵陵不自勝
猶喜眼中多壯觀
時看雲海化鯤鵬

劍南詩藁卷二十